

31/05/1998

Majlis perunding IKS ditubuhkan

Kamal Ahmad; Zulkofli Jamaludin; Nurul Adlina Kamaludin
KUALA LUMPUR: MCA menubuhkan Pusat Perundingan Industri Kecil dan Sederhana (IKS) Kebangsaan untuk meningkatkan pengeluaran industri itu bagi membantu kerajaan menangani masalah ekonomi.

Serentak penubuhan itu, majlis perundingan IKS peringkat negeri akan ditubuhkan bagi mengerah segala sumber untuk menambah pengeluaran pasaran tempatan dan eksport.

Presidennya, Datuk Seri Dr Ling Liong Sik, berkata matlamat utama majlis itu bagi menjaga kepentingan IKS yang kini merangkumi 75 peratus daripada sektor pembuatan negara.

"MCA sedar betapa penting sumbangan IKS dalam pertumbuhan ekonomi negara. Ia satu aktiviti ekonomi yang dianggap boleh menjadi fungsi penting dalam membantu usaha memulih ekonomi negara.

"Majlis ini akan memastikan segala isu dan masalah yang berkaitan dengan IKS dapat diketengahkan serta ditangani dengan cepat dan berkesan," katanya ketika berucap pada perasmian Perhimpunan Agung MCA ke-45 di Wisma MCA, di sini semalam.

Lebih 2,000 perwakilan dari seluruh negara menghadiri perhimpunan sehari itu yang dirasmikan Perdana Menteri, Datuk Seri Dr Mahathir Mohamad.

Turut hadir pemimpin komponen Barisan Nasional (BN), bekas pemimpin kanan MCA, termasuk Presiden Kehormat parti itu, Tan Sri Lee San Choon.

Dr Ling berkata, majlis perundingan peringkat negeri akan diwakili ahli MCA, Persatuan Perniagaan Cina, Gabungan Persatuan Cina dan Persatuan SMI.

"Menerusi penubuhan ini satu badan induk dapat berinteraksi dan menyelaraskan badan di peringkat negeri dapat diwujudkan bagi memenuhi keperluan pengusaha IKS.

"Tidak mustahil satu masa nanti, barangan keluaran IKS Malaysia akan dieksport dan menjadi barangan jenama popular di pasaran antarabangsa," katanya.

Dalam ucapan selama kira-kira 35 minit itu, Dr Ling juga mengumumkan penubuhan satu projek untuk membantu ahli perniagaan membabitkan diri dalam perdagangan elektronik dengan menubuhkan halaman web mereka sendiri.

Melalui cara itu, katanya, MCA dapat membantu ahli perniagaan berkembang dan memasuki pasaran antarabangsa di samping menggalakkan penggunaan komputer di peringkat sekolah.

"MCA sudah pun bekerjasama dengan persatuan perdagangan dan industri Cina mengumpul komputer model lama untuk dinaik taraf sebelum dihadiahkan kepada sekolah semua aliran," katanya.

Menurut Dr Ling, MCA juga meningkatkan usaha menyemai minat terhadap pemikiran strategik dalam kehidupan seharian masyarakat.

(END)